

DOMINGU XIV TEMPU KOMÚN – TINAN A

Tema

Liturjia domingu ne'e nian hanorin ita iha ne'ebé ita hetan Maromak. Nia garante ita katak Maromak la hatudu An iha arrogánsia, iha foti-an, iha propoténsia, maibé iha simplisidade, iha haraik an, iha pobreza.

Leitura dahuluk apresenta mai ita Maromak nia manu-ain ne'ebé mai hasoru ema sira iha pobreza, umildade, simplisidade; no ho forma ne'e mak nia elimina instrumentu sira funu no mate nian no instaura dame definitiva.

Iha *Evanjellu*, Jezús hahí Aman tanba proposta salvasaun ne'ebé Maromak halo ba ema sira (no ema matenek sira hewai) hetan simun/akollimentu iha “ema ki'ik sira” nia fuan. “Ema boot sira”, metin iha sira nia foti-an no autosufisiénsia, la iha tempu no disponibilidade ba Maromak nia dezafiu sira; maibé “ki'ik sira”, iha sira-nia pobreza no simplisidade, disponivel nafatin atu simu Maromak nia novidade libertadora.

Iha *leitura daruak*, Paulo konvida sarani sira – ne'ebé kompromete an ho Jezús husi kedas loron Batizmu – atu moris “tuir Espiritu” no la'ós “tuir isin”. Moris “tuir isin” mak pertense ba ema sira ne'ebé metin iha sira-nia egoíзму, foti-an no autosufisiénsia; moris “tuir Espiritu” mak moris ida ema sira ne'ebé aseita Maromak nia proposta sira nian.

LEITURA I – Zac 9,9-10

Livru Zacarias nian mak livru profétiku ida ho kapítulu 14. Atualmente, estudiozu sira Bíblia nian lian ida de'it atu rekoñese katak iha diferença entre kapítulu 8 uluk no kapítulu sira seluk: diferença iha kontestu, estilu, vokabuláriu no temátika, no katak ita tenke ko'alia kona-ba livru rua ne'ebé tau hamutuk no autór rua ne'ebé lahanesan. Tanba ita la koñese autór livru daruak (kapítulu 9-14) nia naran, estudiozu sira hanaran “Deutero-Zacarias”. Testu ohin nian pertense ba “Deutero-Zacarias”.

Maioria komentadór sira koloka testu sira Deutero-Zacarias nian iha finál sékulu IV eh sékulu III mK nia inísiu. Nune'e, ita iha ambiente pós-ezíluku. Kontestu lori ita ba época liutiha Alexandre husi Macedónia nia vitória sira, bainhira Maromak nia Povu integra an iha impériu eléniku.

Livru ne'e subliña maka'as figura Mesias nian, nu'udar liurai, bibi-atan no Na'i nia atan. Iha primeira parte (kf. Zac 9,1-11,7), profeta haklaken Maromak nia intervensaun definitiva atu tulun nia Povu, iha figura Mesias nian; iha segunda parte (kf. Zac 12,1-14,21), orákulu sira deskreve Jerusalém nia salvasaun no glória abanbairua nian.

MENSAJEN

Deutero-Zacarias deskreve, iha orákulu ne'e, Liurai Jerusalém nia fila hikas iha vitória. Nia konvida sidade atu haksolok basá ninia liurai, “justu no makso'ik” to'o ona.

Maibé liurai ne'e tama iha sidade iha haraik an no iha dame: nia sei la sa'e kuda funu nian (símbolu militarizmu nian), maibé “kuda-oan ida, kuda-inan nia oan”. “Liurai” ne'e nia atitude kontrasta momoos ho ema boot sira mundu nian ne'ebé hatudu sira nia forsa, poder, agressividade...

Maski nune'e, “liurai” haraik an ne'e iha kbiit atu harahun funu (nia sei harahun instrumentu

sira mate nian – kareta funu nian, kuda sira funu nian, rama-hana sira funu nian) no atu haklaken dame universál. Ninia “ukun” mak ukun husi rai-ulun to’o rai-ikun.

LEITURA II – Rom 8,9.11-13

Surat ba Roma apresenta Paulo ida ne’ebé tasak. Depoizde tinan barak serbisu misionáriu kolen-laek, Paulo espoin ho forma hakmatek ninia reflesaun kona-ba salvasaun (iha altura iha-ne’ebé kestaun salvasaun nian mak kestaun teolójika ida “manas”: sarani sira husi judeu fiar katak presiza kontinua kumpre Lei Moisés nian atu hetan salvasaun; sarani husi jentiu sira la iha vontade atu submete an ba ritu sira Lei judaika nian).

Iha Paulo nia perspetiva, salvasaun mak don ida ema ida la merese (basá hotu-hotu moris iha salan laran – kf. Rom 1,18-3,20), maibé Maromak oferese tan nia laran di’ak ba ema hotu (kf. Rom 3,1-5,11). Salvasaun ne’e to’o mai ita liuhusi Jezús Kristu (kf. Rom 5,12-8,39); no atua iha ita liuhusi Espíritu (kf. Rom 8,1-39).

Testu ne’ebé ohin propoin mai ita halo parte ba kapítulu ida iha-ne’ebé Paulo reflète kona-ba moris iha Espíritu. Paulo nia pensamentu teolójiku atinje pontu aas liu: tema boboot hotu Paulo nian (Maromak nia projetu ba ema nia di’ak; Kristu nia asaun libertadora, liuhusi ninia vida saran an nian, mate no moris-hi’as; moris foun ne’ebé halo fiar-na’in sira sai Ema Foun no sai Maromak nia oan) bele hetan iha ne’e.

Espíritu mak elementu fundamentál ne’ebé fó unidade ba reflesaun ne’e tomak. Nia mak horik iha projetu salvasaun nia kotuk, no Paulo la kole atu fó sasin kona-ba ne’e.

MENSAJEN

Jezús, hala’o nia moris atu kumpre Aman nia projetu salvasaun ba ema. Ninia asaun xoke ho interese na’in sira mundu nian, no sira oho Nia iha krús.

Maski nune’e, mate iha krús la’ós buat hotu nia rohan: Maromak nia Espíritu, be nafatin horik iha Jezús, halo Nia moris hi’as, tanba ema ne’ebé fó moris sei la mate.

Jezús oferese ba ninia dixípulu sira Espíritu hanesan. Dixípulu sira tenke konxiente katak, se sira moris hanesan Jezús no halo sira-nia moris don ida ba Maromak no maluk sira, sira mós sei simu moris foun no definitiva ne’ebé Espíritu haraik ba Jezús.

Paulo konvida sarani sira atu foti konkluziun prátika husi realidade ne’e: se sira moris “tuir isin”, sira sei mate; maibé sira moris tuir Espíritu, sira sei moris hi’as ba moris foun.

Moris “tuir isin” iha Paulo nia perspetiva katak, moris iha opozisaun ba Maromak – eh taka an ba Maromak, ho egoíзму, autizmu, autosufisiénsia ne’ebé lori ema atu la moris ukun-fuan sira proposta sira no valór sira Maromak nian; “moris tuir Espíritu” mak moris iha relasaun ho Maromak, hodi rona Ninia proposta sira, iha obediénsia ba Maromak nia projetu no sujestaun sira iha saran an ba ema sira.

Paulo husu maka’as ba sarani sira atu halo sira nia hilin. Paulo iha interese, liuliu, atu hatudu ba fiar-na’in sira katak hodi tuir Kristu de’it mak garante ba ema vida definitiva.

EVANJELLU – Mt 11,25-30

Liutiha “diskursu misaun” nian no mandatu dixípulu sira nian ba mundu atu kontinua obra libertadora Jezús nian (kf. Mt 9,36-11,1), Mateus tau iha ninia Evanjellu nia eskema sesaun ida kona-ba reasaun no atitude sira ne’ebé ema no grupu oioin foti iha Jezús no Ninia proposta “Reinu” nian nia oin (kf. Mt 11,2-12,50). Ita-nia testu integra sesaun ida-ne’e.

Iha versíkulu anteriór ba testu ohin nian (kf. Mt 11,20-24), Jezús halo krítika makhorik

sidade sira besik bee-lihun Tiberíades (Corozaim, Betsaida, Cafarnaum), tanba sira sai testemuñu Ninia proposta salvasaun nian no mantein indiferente. Sira nakonu demais ho an rasik, metin iha sira-nia inserteza, toos ho sira-na prekonseitu sira no la aseita atu kuestiona sira-nia an, atu loke fuan ba Maromak nia novidade.

Oras-ne'e, Jezús konvensidu katak proposta ne'ebé sidade sira iha leten rejeita hetan akollimentu husi ema kaik no iha ninin sira, ne'ebé la kontente ho relijiaun ofisiál no buka libertasaun ne'ebé Maromak oferese ba sira.

Ita-nia testu forma ho "frazé tolu" ne'ebé Jezús karik hato'o iha ambiente lahanesan husi ida-ne'ebé Mateus apresenta mai ita. "Frazé" rua husi sira-ne'e (kf. Mt 11,25-27) hetan mós iha Lucas (kf. Lc 10,21-22) no mai husi dokumentu ida ne'ebé tau hamutuk Jezús nia "frazé" sira no Mateus nune'e mós Lucas utiliza iha kompozisaun ba sira-nia evanjellu sira. Frazé datoluk (kf. Mt 11,28-30) ne'e ezkluzivu Mateus nian.

MENSAJEN

Frazé dahuluk (kf. Mt 11,25-26) mak orasaun ida hahí nian ne'ebé Jezús diri je ba Aman tanba Nia subar "buat sira-ne'e" ba "ema neon-na'in no matenek sira" no hatudu sai ba "ema ki'ik sira".

"Ema neon-na'in no matenek sira" mak "farizeu no doutór sira Lei nian", ne'ebé absolutiza Lei, ne'ebé konsidera sira nia an ema justu no dignu salvasaun nian tanba kumpre didi'ak Lei, no la dispostu atu husik sistema relijiozu ne'ebé sira hela metin bá, no tuir sira garante salvasaun. "Ema ki'ik sira" mak dixípulu sira, ema dahuluk sira atu hatán ho modu pozitivu ba oferta "Reinu" nian; no mós ema kiak sira no marjinalizadu sira (moras, publikanu, fetu sira ho moris aat, "povu rai nian") ne'ebé Jezús hasoru loron ba loron iha dalan sira Galilea nian, ne'ebé Lei konsidera sira ema aat, maibé simu ho ksolok no entuziazmu, Jezús nia proposta libertadora.

Frazé daruak (kf. Mt 11,27) relasiona ho ida uluk no esplika saida mak subar tiha ba "ema matenek no intelijente sira" no hatudu sai ba "ema ki'ik sira". Buat ne'e mak "koñesimentu" (katak, esperiénsia kle'an no íntima) Maromak nian.

"Ema matenek no intelijente sira" (farizeu no doutór sira Lei nian) konvensidu katak koñesimentu Lei nian fó ba sira koñesimentu Maromak nian. Ba sira, Lei mak ligasaun direta ba Maromak, no liuhusi Lei sira koñese Maromak, Ninia vontade, ninia projetu sira ba mundu no ba ema sira; tan ne'e, sira apresenta an nu'udar detentór (makaer) lialoos nian, representante lejítimu Maromak nian, ho kbiit atu interpreta Ninia vontade no planu sira.

Jezús halo klaru katak ema ne'ebé hakarak halo esperiénsia kle'an no íntima ho Maromak tenke aseita Jezús no tuir Nia. Nia mak "Oan-Mane" no Nia de'it mak iha esperiénsia kle'an intimidade no komuñau nian ho Aman. Ema ne'ebé rejeita Jezús labele "koñese" Maromak: ema sira-ne'e iha imajen laloos Maromak nian no aplika atu julga ema sira. Maibé ema ne'ebé aseita Jezús no tuir Nia, aprende atu moris iha komuñau ho Maromak, iha obediénsia totál ba Ninia projetu sira no iha aseitasaun inkondisionál ba Ninia planu sira.

Frazé datoluk (kf. Mt 11,28-30) mak konvite ida atu bá hasoru Jezús no aseita Ninia proposta: "Mai besik Ha'u, imi hotu ne'ebé kole no terus; Ha'u sei fó kmaan ba imi . Imi simu ha'u nia baha ba hodi banati tuir Ha'u, tan Ha'u laran kmaus no haraik an; no imi sei hetan kmaan ba imi nia klamar. Basá Ha'u-nia ukun mamar, Ha'u-nia naha kmaan".

Ba farizeu sira Jezús nia tempu nian, naha ne'e mak Lei (kf. Si 6,24-30; 51,26-27) – norma aas liu moris nian. Ba farizeu sira, naha ne'e la todan, maibé tenke sai naha glória nian no tenke lori ho ksolok.

Iha realidade, ne'e "naha" ida todan liu. Impossibilidade atu loroloron kumpre ukun-fuan 613 Lei eskrita nian, kria konxiénsia todan no depresaun, terus. Fiar-na'in sira, ne'ebé labele moris tuir Lei, sente sira simu kondensasaun no simu malisan, dook husi Maromak no la

merese salvasaun. Lei hatodan eh hadadur ema envezde liberta ema; Lei hadook ema husi Maromak envezde lori ema ba komuñau ho Maromak.

Jezús mai liberta ema husi moris-atan Lei nian. Nia dirije Ninia proposta libertasaun kompletu ba ema moras sira (tuir teolojia ofisiál, moras mak vítima Maromak nia kastigu nian), ba maksalak sira (publikanu, feto moris aat, no sira hotu ne'ebé iha komportamentu la loos iha públiku iha área polítika, sosiál eh relijioza). Ba povu simples país nian (ne'ebé tanba moris difisil sira labele kumpre didi'ak ritu sira Lei nian), ba ema hotu ne'ebé Lei ezklui no fó malisan bá. Jezús garante ba sira katak Maromak la ezklui no la fó malisan ba sira no konvida sira atu integra an iha mundu foun “Reinu” nian. Iha dinámika foun proposta Jezús nian mak sira sei hetan ksolok ne'ebé Lei la fó ba sira.

Proposta “Reinu” nian la'ós proposta ida rezerva ba klase determinada ida (ema kiak sira, ema fraku sira, ema sira iha moris nia ninin) eh klaze ema riku no kbiit-na'in nian... Lae. Proposta “Reinu” nian destina ba ema hotu, mane no feto, laho esesaun... Maski nune'e, ema kiak no fraku sira ne'ebé la hetan ema nia tulun mak iha fuan ida disponivel liu atu simu Jezús nia proposta. Ema sira seluk (riku no kbiit-na'in sira) nakonu demais ho an rasik, ho sira-nia interese, ho sira-nia eskema organizadu, atu aseita risku mai husi Maromak nia novidade.

Hodi simu Jezús nia proposta no tuir Nia, ema kiak sira hetan Aman, sai “Maromak nia oan sira” no sei deskobre moris nakonu, salvasaun definitiva, ksolok totál.